

12 Bainistíocht stoic in Óglaigh na hÉireann

- 12.1

Luacháladh stoic a bhí i gcuntas leithreasa na Roinne Cosanta (an Roinn) ag deireadh na bliana 2022 ar nach mór €255 mhilliún.¹ Bhain mórchuid de na stoic (€254 mhilliún) le hearraí trealaimh mhíleata a bhí i seilbh Óglaigh na hÉireann (féach Fíor 12.1).² Bhí na hearraí sin á gcoinneáil i 383 chuntas stórais aonair i 23 láthair ar fud na tíre agus thar lear.³
- 12.2

Rinneadh athbhreithniú foirmiúil ar bhainistíocht fardail in Óglaigh na hÉireann in 2014. Maidir leis an tuarascáil a d'eascair as an athbhreithniú — *Athbhreithniú ar Bhainistíocht Fardail in Óglaigh na hÉireann* (dá ngairtear tuarascáil Dunning) — tugadh chun críche é i mí na Bealtaine 2014.⁴ Sainaithníodh sa tuarascáil roinnt moltaí is féidir a chur chun feidhme ar bhainistíocht fardal agus ar áiríodh leo, inter alia, soláthar, bainistiú, diúscairt/díluacháil, luacháil, agus tuairisciú.
- 12.3

Tugadh faoin mbreithniú seo chun measúnú a dhéanamh ar leordhóthanacht na rialuithe atá i bhfeidhm chun stoic i seilbh Óglaigh na hÉireann a bhainistiú, a luacháil agus cuntas ceart a thabhairt ina leith, agus béim ar leith ann ar mholtaí thuarascáil Dunning a chur chun feidhme. Tugadh cuairt ar chúig láthair (lenar áiríodh ocht stóras mhíleata) mar chuid den bhreithniú.⁵

1 Ciorclán 22/2022: *Ceanglais maidir le Cuntais Chuí 2022* i gcás stoic athainmnithe mar fhardail.

2 Mar chuid d'Óglaigh na hÉireann tá an tSeirbhís Chabhlaigh, an tAerchór agus an tArmchór. Deighltear an tArmchór arís ina naoi gCór. Tá gach Cór freagrach as réimse sonrach freagrachta.

3 Is éard is stóras míleata ann ná na foirgnimh uile nó láithreacha iata ina gcoinnítear nó ina stóráiltear earraí trealaimh ar le hÓglaigh na hÉireann iad.

4 Ba é an mheitheal faoi chathaoirleacht an Uasail Aidan Dunning, iar-Ard-Rúnaí ar an Roinn ar ar tugadh an Roinn Cumarsáide, Fuinnimh agus Acmhainní Nádurtha tráth a rinne an t-athbhreithniú.

5 Ba iad na láithreacha ar tugadh cuairt orthu ná Baile Dhónaill (Baile Átha Cliath), an tAerchór; Inis Sionnach (Corcaigh), Stórais Theicniúla an Chabhlaigh agus LÉ Samuel Beckett; Campa an Churraigh (Cill Dara), Ordánas agus Cumarsáid; Dún Uí Choileáin (Corcaigh), Cumarsáid agus Leigheas; agus Dún Mhic Aoidh (Baile Átha Cliath), Ceanncheathrú Lóistíochta.


Stoic á gcoinneáil

- 12.4

Tá méadú thart ar 26% tagtha ar luach an stoic atá á choinneáil ag Óglaigh na hÉireann ó 2017 i leith. Cé gur tháinig laghdú ar leibhéil stoic thaifeadta sa tréimhse 2012 go 2017, tharla sé sin den chuid is mó de thairbhe glanadh sonraí agus athaicmiú sócmhainní atá ag dul ar aghaidh go fóill.
- 12.5

I dtaca le cosaint agus bainistíocht fhardal agus shócmhainní seasta Óglaigh na hÉireann de, tá treoracha, beartais agus nósanna imeachta mar bhonn agus mar thaca acu. Tá Stiúrthóirí Cóir Aonair freagrach as beartais agus nósanna imeachta sonracha a fhorbairt dá sainréimsí. Tá úinéirí cuntais agus oibreoirí sna stórais aonair freagrach as na beartais agus na nósanna imeachta a chur i bhfeidhm.

Fíor 12.1 Luach an stoic mhíleata á choinneáil ag Óglaigh na hÉireann 2012 – 2022^a




Foinse: Vóta 36 Cuntais leithreasa na Roinne Cosanta 2012 – 2022

Nóta a Maidir leis an méadú a tháinig ar an bhfardal ag deireadh 2022, tharla sé den chuid is mó de thairbhe gur ceannaíodh méid armlóin nach beag i dtreo dheireadh 2022 agus gur tháinig méadú ar a cuid sealúchas breosla.

- 12.6** Dar leis an Rialtas, coimeádann Óglaigh na hÉireann líon mór d'ábhair stórála éagsúla lena chinntiú go bhfuil siad in ann riar ar riachtanais oibriúcháin leanúnacha agus go bhfuil stoic chuí i bhfeidhm acu le freastal ar riachtanais theagmhasacha i gcomhréir leis na ról a leagann an Rialtas amach d'Óglaigh na hÉireann.
- 12.7** Ag deireadh 2022, bhí nach mór 61% (de réir luacha) den stoc míleata iomlán á choinneáil ag an gCór Ordanáis (féach Fíor 12.2).¹ Tá miondealú níos mionsonraithe ar na ceithre Chór a bhfuil an méid stoic is mó acu (de réir luacha) le fáil freisin i bhFíor 12.2.

Fíor 12.2 Stoic mhíleata de réir Cóir agus de réir cineáil, an 31 Nollaig 2022



1 Tugann an Cór Ordanáis tacaíocht theicniúil d'Óglaigh na hÉireann maidir le soláthar, stóráil, dáileadh, iniúchadh, cothabháil, deisiú agus diúscairt gach earra trealamh a bhaineann le hordanás. Tá idir mhionairm, dhiúracáin frith-aerárthaí, threalamh cosanta pearsanta agus éidí a chaitheann pearsanra míleata mar chuid de sin.

Foinse: An Roinn Cosanta

Nóta: a SEC — Seirbhísí cumarsáide agus faisnéise.


12.8 Taifeadtar stoc ar an modúl fardail de Chóras Chreat Bainistíochta Faisnéise na Roinne (CBF).¹ Tá cód earra Roinne ar leith ag gach earra stoic is féidir a úsáid chun méideanna stoic á gcoinneáil a shainaithint. Tá córas ar leith ag an Aerchór chun taifead a dhéanamh ar a chuid stoc — an Córas um Chothabháil Aerárthaí a Bhainistiú (CCAB).²

12.9 Ní raibh ach rochtain ‘amhaire amháin’ ag an bhfoireann scrúdaithe ar na liostaí mionsonraithe de stoic atá ar taifead sa CBF, ach ba leor é sin chun iniúchadh a dhéanamh. Dúirt an Roinn go leagann Óglaigh na hÉireann béim mhór ar shlándáil agus go bhfuil beartais agus nósanna imeachta cuimsitheacha i bhfeidhm acu. Luaigh sí freisin an líon mór earraí slándála atá á gcoinneáil sna stórais (lena n-áirítear airm, armlón agus pléascáin) agus dúirt sí go ndéantar rochtain ar an bhfaisnéis seo a dhianrialú.

Láithreacha stoic

12.10 Coinnítear tuairim is 70% de stoc Óglaigh na hÉireann i stórais i mBaile Átha Cliath, i gCill Dara agus sna ceantair máguaird; coinnítear 20% de i stórais i gCorcaigh; agus coinnítear tuairim is 10% i stórais fud fad an chuid eile den tír agus thar lear (féach Fíor 12.3).

Fíor 12.3 Láithreacha na bpríomhstóras míleata^{a,b}



1 Tá an Fhoireann R-Ghnó Oracle (eBS) suite laistigh den CBF. Mar chuid den eBS tá modúil amhail fardal, ceannach, sócmhainní seasta agus cothabháil sócmhainní. Baineann pearsanra Óglaigh na hÉireann leas as an eBS chun taifead leictreonach a dhéanamh ar shonraí idirbhearta a bhaineann le príomhfheidhmeanna cuntais stórais mhíleata, i.e., soláthar, stóráil agus leithdháileadh earraí stóras.

2 Tugtar an dá fhiúir stoic le chéile faoi choinne an chuntais leithreasa bhliantúil.

Foinse: An Roinn Cosanta

Nótaí: a Léirítear i méid an chiorcail an leibhéal stoic (de réir luacha) san áit.

b Ní áirítear stoc á atá á choinneáil thar lear.

Cur chun feidhme mholtaí na tuarascála maidir leis an athbhreithniú ar fhardail

- 12.11** Tar éis tuarascáil Dunning a thabhairt chun críche, cuireadh grúpa forfheidhmithe ar bun i mí Iúil 2014 chun maoirseacht a dhéanamh ar chur chun feidhme na 27 moladh atá sa tuarascáil.¹ Rinneadh cúig mholadh a bhfuil buntábhacht leo agus as a dtagann na moltaí eile go léir a shainaithint agus a chur in ord tosaíochta.
- beartas bainistíochta stoic a thabhairt isteach; agus íosleibhéil agus uasleibhéil de shealúchais fardail a shainaithint go háirithe
 - beartas diúscartha atá sainithe go soiléir a fhorbairt
 - tuarascáil bhliantúil chomhordaithe idir an Roinn agus Óglaigh na hÉireann a fhoilsiú
 - aghaidh a thabhairt ar chumais na Foirne R-Ghnó (eBS)
 - achar ama atá sainithe go soiléir le haghaidh na moltaí a chur chun feidhme.
- 12.12** Ag teannadh ar dheireadh mhí na Bealtaine 2015, thuairiscigh an grúpa forfheidhmithe ar thoradh a chuid oibre agus rinne sé breithniú ar an dul chun cinn atá déanta maidir leis na cúig mholadh a bhfuil buntábhacht leo a chur i gcrích.² Bunaithe ar athbhreithniú ar thuarascáil an ghrúpa, níor léir don fhoireann scrúdaithe cá mhéad díobh a bhí curtha chun feidhme faoi mhí na Bealtaine 2015 de thairbhe gur catagóiríodh roinnt gníomhartha mar chinn a bhí 'idir lámha go fóill' agus nár léir gur luadh spriocdhátaí faoina mbeadh gach moladh curtha chun feidhme.
- 12.13** Cuireadh an fhreagracht as na moltaí a chur chun feidhme ar aghaidh chuig an Roinn ansin, ach níor leagadh cúram sonrach ar aon dream faoi leith as monatóireacht a dhéanamh ar aon dul chun cinn a dhéanfaí ó thaobh cur chun feidhme de. Tá ráite ag an Roinn, ag deireadh mhí an Mheithimh 2023, go bhfuil 21 cheann de na 27 moladh i dtuarascáil Dunning curtha chun feidhm go hiomlán (féach larscríbhinn 12A) agus go bhfuiltear fós i mbun na moltaí atá fágtha (sé cinn) a chur chun feidhme (féach Fíor 12.4).

1 Sa ghrúpa bhí baill foirne shinsearachas ón Roinn agus ó Óglaigh na hÉireann.

2 Tuarascáil ar Chonclúidí an Chomhghrúpa Forfheidhmithe agus na nithe a chuir sé chun feidhme – maidir leis an Tuarascáil ar Bhainistíocht Fardail in Óglaigh na hÉireann (Bealtaine 2014).

Fíor 12.4 Na moltaí ó thuarascáil Dunning nach raibh curtha chun feidhme go hiomlán faoi mhí an Mheithimh 2023

Moladh	Stádas	Tagairt larscríbhinn 12A
Ardtosaíocht: Ba cheart plean trealaimh nua d'Óglaigh na hÉireann a thabhairt chun críche ar bhonn práinne, lena n-áirítear obair chun caiteachas Cosanta áirithe a athaicmiú, mar shampla, stoc áirithe a athaicmiú mar shócmhainní.	Tá an plean trealaimh seo curtha chun feidhme. Cé go bhfuil cuid mhór den tionscadal códaithe críochnaithe, tá stop curtha go sealadach leis na gnéithe eile de go dtí go dtabharfar an tionscadal uasghrádaithe eBS chun críche.	2
Tosaíocht mheánach: Athbhreithniú a dhéanamh ar na struchtúir bainistíochta fardail atá ann cheana agus ar shocrúithe stórála.	Tá an obair seo ar siúl go fóill. Nuair a bheidh tuarascáil an Choimisiúin maidir le hÓglaigh na hÉireann (a foilsíodh i mí Feabhra 2022) curtha chun feidhme, is dóigh go mbeidh tionchar aige sin ar struchtúir bhainistíochta fardail agus ar na socruithe stórála.	4
Ardtosaíocht: Spriocanna soiléire agus torthaí soiléire a chomhaontú maidir le bainistíocht fardail.	Tá beartas nuashonraithe bainistíochta stoic i gcomhair na tréimhse 2023 go 2025 á chur chun feidhme faoi láthair agus tabharfaidh sé sin breis teorach maidir le spriocanna a shocrú, príomhtháscairí feidhmíochta san áireamh.	6
Tosaíocht mheánach: Caithfear cur leis an eBS de réir mar is gá ar mhaithe le gach faisnéis ábhartha a thuairisciú i bhfóir-am agus go cruinn. Déanfar breithniú dáríre i dtaobh an CCAB a chomhtháthú isteach san eBS.	Tá tuairisciú léargais ar bhogearraí tar éis feabhas a chur ar an tuairisciú a fhaightear ón eBS. Cé go bhfuil an CCAB fós lasmuigh den eBS, tá faisnéis dúnta fardail á giniúint ar bhonn míosúil ó 2021 i leith agus á cur ar taifead san eBS.	12
Tosaíocht mheánach: Maidir le tionscadail éagsúla atá idir lámha chun cóid a ghlanadh suas, ba cheart leanúint díobh agus iad a thabhairt chun críche chomh luath géar agus is féidir. Líon na dtuairiscí catagóire agus earra a chuíchóiriú.	Tá an chuid is mó den ghlanadh sonraí agus den phróiseas códaithe críochnaithe. Tá stop curtha leis go sealadach de bharr an tionscadail uasghrádaithe eBS atá ag dul ar aghaidh go fóill. Tá athaicmiú sócmhainní á mheas i gcomhthéacs ina bhfuil caighdeán cuntasaithe rialtais láir agus forbairtí cuntasaithe ar bhonn fabhráithe á gcur chun feidhme.	23
Tosaíocht mheánach: Ba cheart don Eagraíocht um Chosaint athbhreithniú a dhéanamh ar an straitéis atá aici i leith teicneolaíocht faisnéise agus cumarsáide (TFC) a fhí isteach i slabhra soláthair Óglaigh na hÉireann le gur féidir lántairbhe a bhaint as cumais TFC ar bhealach a chuireann bonn faoi fheidhmíocht éifeachtúil ar fud an tslabhra soláthair. ^a	Táthar fós i mbun é a chur chun feidhme agus idirchaidreamh á dhéanamh leis an Oifig um Sholáthar Rialtais maidir le sonraí comhroinnte. Cuirfidh soláthar céimneach Seirbhísí Comhroinnte Bainistíochta Airgeadais (SBCA) tuilleadh feabhais ar fhorbairtí.	27

Foinse: An Roinn Cosanta agus larscríbhinn 12A

Nóta: a San Eagraíocht um Chosaint tá an Roinn Cosanta agus Óglaigh na hÉireann.

Bainistíocht Stoic

- 12.14** Tá 383 chuntas stórais ar leith ann sa chóras CBF ina gcoinnítear taifid maidir le sócmhainní seasta agus stoc.^{1,2} Bíonn éagsúlacht ann maidir le réimse agus luach na n-earraí á gcoinneáil i ngach stóras. Ag deireadh 2022, bhí stoc ab fhiú €87 milliún nó 34% de luach iomlán an stoic sa chuntas aonair is mó. Is i gceithre chuntas stórais (1%) a bhí leath an luacha stoic. Ag deireadh 2022, bhí breis agus 60 (16%) cuntas stórais aonair ann a raibh stoc ar luach níos lú ná €10,000 iontu. É sin ráite, dúirt lucht na Roinne gur éirigh leo é sin a laghdú go figiúr faoi bhun 10% de na cuntais stórais faoi mhí na Bealtaine 2023.
- 12.15** Dúirt an Roinn gur bunaíodh comhghrúpa idir an Roinn agus Óglaigh na hÉireann, *an Mheitheal Eagrúcháin agus Fofhardail*, in 2020 chun athbhreithniú a dhéanamh ar an gcaoi ina gcuirtear stórais ar bun, lena n-áirítear an bunús le suíomhanna a roghnú agus na socruithe atá i bhfeidhm chun stórais a bhainistiú; chomh maith le moltaí a dhéanamh faoin gcur chuige is fearr.
- 12.16** D'eisigh an grúpa tuarascáil in 2021 inar luadh go raibh dlúthbhaint ann idir líon na gcuntas agus eagrú is leagan amach Óglaigh na hÉireann. Moladh go ndéanfaí laghdú beag ar líon na gcuntas agus cuntais eile a leagan amach ar bhealach nua chomh maith le hiad a athainmniú. Níor cuireadh moltaí an ghrúpa chun feidhme go fóill, áfach.
- 12.17** De rogha ar stocáireamh bliantúil a dhéanamh, déantar áirimh thimthrialla i stórais níos mó agus san Aerchór mar mhodh bainistíochta stoic. Tá sé de bhua ag na háirimh sin gur féidir le lucht an stórais leanúint orthu i mbun oibre agus gan aon ghá leis na stórais a dhúnadh chun tabhairt faoi stocáirimh. In áireamh timthrialla, cumann an córas CBF sampla randamach de chóid stoic atá le comhaireamh agus a dheimhniú ar an lá sin. Sa chás nach ionann an líon iarbhir agus an líon atá taifeadta ar an gcóras, déantar é sin a mharcáil ar an gcóras CBF lena fhiosrú.
- 12.18** I gcomhréir le conarthaí le roinnt dá soláthraithe, cabhraíonn an tAerchór le stoc de pháirteanna aerárthaí dílsithe a bheith á gcoinneáil ag na soláthraithe ag bunáit Bhaile Dhónaill dá chuid. Déanann fostaí de chuid an soláthraí an stoc a bhainistiú ar an láithreán. Ní áirítear ar an luacháil stoc stoic den sórt seo, agus is ag an bpointe ceannaigh amháin a thugtar cuntas ina leith.

Aicmiú stoic

1 Is ionann na cuntais stórais mhíleata agus na cuntais fardail a thaifeadtar ar chóras an Chreata Bainistíochta Faisnéise (CBF). Tugtar fofhardail orthu sin (FFanna).

2 Gairtear earraí fardail d'earraí stoic ar Chóras Bainistíochta Lóistíochta Óglaigh na hÉireann.

3 Faoi na maolú, laghdaítear an gnáth-thairseach (€10,000) le haghaidh earraí a thaifeadtar mar shócmhainní ar fud ranna agus oifigí ar rialtais láir go €1,000.

- 12.19** Aicmítear gach earra a choinnítear sna cuntais stórais mhíleata mar shócmhainn sheasta nó mar earra stoic. Is éard is sócmhainní seasta ann ná earraí a bhfuil an chosúlacht orthu go mbainfidh Óglaigh na hÉireann tairbhe astu go ceann tréimhse níos sia ná aon bhliain amháin agus is iondúil go mbíonn luach ceannaigh níos mó ná €1,000 acu. Tá maolú ag an Roinn ón Roinn Caiteachais Phoiblí, Seachadta ar an bPlean Forbartha Náisiúnta, agus Athchóirithe (RCPSPFNA) a bhfuil sé de bhua aige earraí a bhfuil luach chomh híseal le €1,000 acu a thaifeadadh mar shócmhainní.³
- 12.20** Maidir leis na hearraí a aicmítear mar shócmhainní, leithdháiltear sraithuimhir orthu a thaifeadtar ar an gcóras CBF, agus is féidir gluaiseacht gach earra sócmhainne a rianú leis seo. Is bealach iad taifeadadh earraí mar shócmhainní (e.g., earraí ar díol spéise iad ó thaobh slándála de) chun rianú níos fearr a dhéanamh ar na hearraí seo. Aicmítear gach mion-armra boise mar shócmhainní seasta.

- 12.21** Má tá sé de mhianach in earraí a bheith in-ídithe, aicmítear mar stoc iad. Féadfar inneall eitleáin nó tanc a áireamh mar earra stoic fiú má tá costas mór ag baint leis — mar shampla áirítear páirt d'fheithicil armúrtha Mowag mar chuid den stoc ag €280,000. Os a choinne sin, is féidir earraí níos lú a bhfuil baint acu le slándáil a áireamh mar shócmhainní seasta faoi choinne slándáil agus monatóireacht a dhéanamh fiú más faoi bhun na tairsí luacha ceannaigh atá siad. Lena ais sin, is amhlaidh, i measc ranna cosanta i ndlínsí eile, a aithnítear páirteanna breise caipitil mar shócmhainní seasta i gcomhréir le cleachtais chuntasaíochta idirnáisiúnta (e.g., Aireacht Cosanta na Ríochta Aontaithe (RA)).¹
- 12.22** Dúirt an Roinn go gcloínn sí leis na sainmhínithe ar stoc agus ar shócmhainní seasta a leagtar amach i dtreoir RCPSFNA maidir le cuntais leithreasa bhliantúla.
- 12.23** Tháinig an fhoireann scrúdaithe ar roinnt earraí ar aicmíodh go mícheart iad — mar shampla, i stóras amháin, taifeadadh meaisíní táthaithe (a luacháladh ag €12,570) á n-úsáid chun deisiúcháin a dhéanamh mar stoc seachas mar innealra.²
- 12.24** Tháinig an fhoireann scrúdaithe ar roinnt earraí, leis, (e.g., fáisceán hiodrálach agus sábh ciorclach) a bhí, ainneoin iad a bheith in úsáid, fós á n-áireamh mar stoc sa chuntas stórais. Dúirt an Roinn go gcoinnítear earraí dá leithéid ar an gcóras fardail faoi choinne maoirseachta agus cosanta. Os a choinne sin, níltear de nós fardail a aithint ar chlár comhardaithe Aireacht Cosanta na Ríochta Aontaithe ach amháin ón am a fuarthas é go dtí go dtabharfaí amach le húsáid é.
- 12.25** Tharraing tuarascáil Dunning aird ar an mbaint atá ag stoc agus sócmhainní seasta leis an obair atá ar siúl go fóill chun earraí a chódú lena chinntiú go n-aicmítear iad mar is ceart agus go luacháiltear iad ar bhealach comhsheasmhach. Moladh sa tuarascáil (in 2014), *inter alia*, go dtabharfaí tionscadail éagsúla fós sa siúl sa réimse seo a thabhairt chun críche chomh luath géar agus is féidir. Fuair an fhoireann scrúdaithe amach go raibh an obair sin fós idir lámha.

Luacháil stoic

- 12.26** Suas go dtí 2022, d'úsáid an Roinn cleachtais éagsúla chun na hearraí á gcoinneáil i stoc a luacháil mar a nochtar sa ráiteas faoi pholasaithe agus faoi phrionsabail chuntasaíochta ar glacadh leis le haghaidh vóta na Roinne Cosanta. Dúirt an Roinn go ndearnadh an stoc míleata go léir a luacháil ag meánchostas i gcuntas leithreasa 2022 uaithi.
- 12.27** Luacháiltear stoc míleata ag meánchostas ceannaigh na n-earraí á gcoinneáil, agus go ríomhtar é ar bhonn stóras-ar-stóras. Ní dhéantar meánchostas a ríomh de na hearraí ar fud na stóras go léir. Seans gur gá atháireamh a dhéanamh ar an meánchostas sa stóras glactha má bhogtar aon earra stoic idir stórais. Mar gheall air sin, seans go mbeadh éagsúlacht ann maidir leis an luach atá ag na hearraí céanna ar fud na stóras, toisc gur ceannaíodh nó gur aistríodh isteach sa stóras iad ar phraghsanna éagsúla.
- 12.28** Sainaithe an Roinn gurbh í an mhodheolaíocht luachála i leith meánchostais an mhodheolaíocht costála fardail is oiriúnaí do stoc míleata agus tá sí in úsáid ó 2006 i leith. Athdheimhníodh in 2017 gurbh í an mhodheolaíocht ab oiriúnaí í, i gcomhthéacs an aistrithe chuig SCBA.³

¹ UK Ministry of Defence Annual Report and Accounts 2021-22.

² Ba é €95,000 luach an tsampla iniúchta don stóras seo.


³ Ghlac ranna cosanta sa Ríocht Aontaithe agus san Astráil leis an modheolaíocht seo freisin.

- 12.29** Roimh 2022, bhíodh sé de nós stoc a luacháil ar an bpraghas ceannaigh bunaidh, beag beann ar cibé a ceannaíodh nó nár ceannaíodh earra stoic eile, ar phraghas difriúil b'fhéidir. Coinníodh an praghas ceannaigh bunaidh ar an gcóras CCAB agus úsáideadh é faoi choinne luachála. Dúirt an Roinn go bhfuil uirlis nua curtha ar fáil lenar féidir luachálacha fardail deiridh a ríomh do stoc an Aerchóir ar bhonn meánchostais.

Leibhéil stoic

- 12.30** I mí Eanáir 2015, mar fhreagairt do mholtaí thuarascáil Dunning, ghlac Óglaigh na hÉireann beartas bainistíochta stoic chucu féin i gcomhair na tréimhse 2015 go 2020. Bhí an beartas sin fós i bhfeidhm go dtí deireadh mhí na Bealtaine 2023, tráth ar tháinig beartas nua i gcomhair na tréimhse 2023 go 2025 in éifeacht.
- 12.31** Fearacht bheartas 2015, tá creat rialaithe ar áireamh sa bheartas reatha, rud is féidir le 'húinéirí' agus le feighlithe stoic a úsáid chun a chinneadh conas ba cheart an leibhéal stoic de gach earra á choinneáil a chatagóiriú (féach Fíor 12.5).
- 12.32** Bhí sé i gceist le beartas 2015 go leithdháilfí luachanna uimhriúla (is iad sin, uimhreacha fosta agus uimhreacha uasta maidir le gach earra) ag gach leibhéal de na leibhéil stoic.^{1,2} Diomaite de na luachanna maidir le harmlón áirithe ar tugadh suntas dóibh le linn cuairt a thabhairt ar an long chabhlaigh, fuair an fhoireann scrúdaithe amach nach raibh na leibhéil stoic fosta agus uasta i bhfeidhm maidir le hearraí stoic.³

Fíor 12.5 Creat stoic – beart rialaithe stoic^a



1 Bhí beartas na bliana 2015 i bhfeidhm faoin am ar thug an fhoireann scrúdaithe faoina gcuid oibre allamuigh.

2 Is iad na stiúrthóirí soláthair atá freagrach as seo agus iad ina n-úinéirí agus ina sealbhóirí stoic ar fho-mhírchinn soláthair chineachta soláthair.

3 Inis Sionnach (Corcaigh) — LÉ Samuel Beckett.

Foinse: An Roinn Cosanta

- Nótaí:
- a Ní mór bearta cuí rialaithe stoic a úsáid chun gach sealúchas stoic a bhainistiú.
 - b Is ionann an stoc uasta agus an leibhéal stoic nár cheart a sháru, ach amháin i gcúinsí eisceachtúla nó de bharr imeacht neamhghnách.
 - c Is éard is cúlstoc oibríochtúil ann ná an stoc a chaitear go laethúil.
 - d Is maolán é stoc sábháilteachta idir cúlstoc oibríochtúil agus stoc straitéiseach.
 - e Is éard is stoc straitéiseach ann ná stoc nach féidir le hÓglaigh na hÉireann déanamh gan é.

- 12.33** Idir 2014 agus 2015, rinne na Seirbhísí Faisnéise Cumarsáide (SFC) anailís ar gach gné dá ngluaiseachtaí stoic, lena n-áirítear láimhdeachas fardail, agaí tionscanta agus rátaí úsáide. Fuarthas amach nach raibh pleanáil íosta/uasta oiriúnach don fheidhm i gcás go leor earraí stoic SEC de bharr agaí tionscanta an-fhada, síneadh á chur le saolré eacnamaíoch thar shaolré an mhonaróra agus toisc gur chuir monaróirí deireadh le línte táirgthe páirteanna breise áirithe.
- 12.34** Dar le hÓglaigh na hÉireann i mí Iúil 2022, cé go ndearnadh iniúchadh agus athbhreithniú ar phleanáil íosta/uasta ar leibhéal an stoic roimhe seo ag leibhéal straitéiseach faoi choinne a úsáide laistigh de Chóras Bainistíochta Lóistíochta Óglaigh na hÉireann, cuireadh stop sealadach leis an tionscnamh sin mar gheall ar ghanntanas foirne agus mar gheall ar bhaill foirne i ról thábhachtacha a bheith ag teacht agus ag imeacht de shíor.
- 12.35** Cuireann an beartas bainistíochta stoic nuashonraithe iallach ar gach Cór an beart rialaithe stoic ábhartha a chur chun feidhme, de réir mar is cuí, ar an gcóras bainistíochta stoic a bhaineann go sonrach lena riachtanais rialaithe stoic, faoi cheann dhá mhí dhéag ó dháta an uasghrádaithe, atá le críochnú faoi dheireadh 2023.

Príomhtháscairí feidhmíochta

- 12.36** Fearacht an bheartais a bhí i bhfeidhm in 2015, leagtar amach sa bheartas bainistíochta stoic atá ag Óglaigh na hÉireann faoi láthair gur den ríthábhacht é go socraíonn gach stiúrthóir soláthair, i.e., na húinéirí stoic, príomhtháscairí feidhmíochta (PTFanna). Luaitear sa bheartas seo trí PTF ar féidir leas a bhaint astu
- an ráta láimhdeachais fardail
 - an céatadán d'orduithe neamhchríochnaithe
 - an meán-aga timthrialla ordaithe.
- 12.37** Rud eile de, leagadh amach i mbeartas 2015 gur cheart na PTFanna (samplacha) a chur i bhfeidhm ar bhonn uimhreach roinne aonair, is é sin, cóid earraí aonair, agus go gcuirfí sonraí as a riocht dá ndéanfaí earraí stoic a ghrúpáil le chéile. B'fhearr an nós sin a sheachaint mar sin.
- 12.38** Cé gur iarradh faisnéis faoi PTFanna mar chuid de na cuairteanna a thug an fhoireann scrúdaithe ar láithreáin, níor cuireadh ar fáil í. Ag an am, dúirt Óglaigh na hÉireann nár den phraiticiúlacht é na PTFanna a chur chun feidhme go fóill, go mór mór toisc go raibh éagsúlacht mhór ann ó thaobh stoic de i measc na gCór go léir, gan trácht ar ráta ard athraithe foirne agus easpa bogearraí anailíseacha a bheith ann. Cé gur úsáideadh PTFanna (samplacha) ar uairibh, tharla sé sin ar bhonn neamhfhoirmiúil (e.g., príomhstórais theicniúla SEC).
- 12.39** De réir bheartas 2023, ceanglaítear ar Chóir PTFanna maidir le bainistíocht stoic a shainaithint, a chur chun feidhme agus a thuairisciú go ráithiúil, ag tosú ag deireadh R3 2023.

Athraitheas stoic

- 12.40** Bíonn athraitheas le sonrú i gcónaí idir luacháil stoic sa mhodúl fardail den CBF agus i gcóras cuntasaióchta na Roinne. Tháinig an difríocht sin chun cinn le himeacht ama tar éis an córas CBF atá i bhfeidhm faoi láthair a chur chun feidhme in 2006. Le linn cleachtadh inmheánach a dhéanamh in 2012, sainithníodh roinnt fadhbanna ba bhun leis an athraitheas a dhéanamh níos measa: ba iad sin fabhtanna i mbogearraí, idirbhearta siardhátaithe, cóid lochtacha, slánú agus mí-chatagóiriú.¹
- 12.41** Ba é ba chionsiocair leis an athraitheas, ó thaobh airgeadaíochta de, ná cóid earraí mhíchearta a shannadh do roinnt earraí stoic, is é sin, mí-chatagóiriú. I dtuarascáil deiridh a d'eisigh an fhoireann tionscadail i mí an Mhárta 2014, luadh go raibh an t-athraitheas laghdaithe ó thart ar €14 mhilliún go díreach faoi bhun €400,000. Ag deireadh na bliana 2022, ba é €76,000 an difríocht.
- 12.42** Dúirt an Roinn nach raibh aon fhianaise ann gur tharla an fhadhb arís tar éis uasghrádú bogearraí a dhéanamh. Glacann sí leis go bhfuil an fhadhb seo réitithe anois. Luaigh an Roinn go raibh roinnt difríochtaí fágtha ach meastar nach mbeadh tionchar rómhór acu sa chás seo, agus go bhfuil an chothromaíocht neamhréire réasúnta seasmhach.


Stoc atá as feidhm

- 12.43** Is gnách go ndéantar stoc atá as feidhm a shainaithint le linn stocáirimh a dhéanamh. Le hé a aicmiú mar stoc atá as feidhm, áfach, caithfidh an Bord Suirbhéireachta é a mheas ar dtús.²
- 12.44** Ar mhaithe leis an bpróiseas bainistíochta stoic a dhéanamh níos trédhearcaí, moladh i dtuarascáil Dunning go nochtfaí sna ráitis airgeadais luach stoic ar díscríobhadh é le linn na tréimhse. Ó 2013 i leith, tá sé éirithe ina nós an fhaisnéis sin a nochtadh i gcuntas leithreasa bliantúil na Roinne (féach Fíor 12.6).

Fíor 12.6 Luach an stoic a díscríobhadh, 2013 – 2022

1 Cuireadh foireann tionscadail ar bun ar a raibh baill foirne na roinne agus baill foirne Óglaigh na hÉireann d'fhonn athraitheas i luach an stoic a iniúchadh.

2 Tá Bord Suirbhéireachta comhdhéanta de thriúr comhaltaí d'Óglaigh na hÉireann a cheaptar chun tuairisc a thabhairt ar an mbail atá ar stoc a mheastar é a bheith as feidhm. Is é an Bord a chinneann cé acu atá nó nach bhfuil an stoc atá idir chamáin inúsáidte, indeisithe nó as feidhm nó cé acu atá nó nach bhfuil níos mó aige ann ná mar is gá.



Foinse: Vóta 36 Cuntais leithreasa na Roinne Cosanta, 2013 – 2022

- 12.45** Le linn dóibh cuairt a thabhairt ar an mBunáit Chabhlaigh, fuair an fhoireann scrúdaithe amach, ainneoin go bhfuil long ann a bhfuil cuntais stórais ceangailte leis an gcóras bainistíochta stoic aici, go bhfuil seans ann fós go gcoinnítear idirbhearta in áit eile ar scarbhileog Excel de dheasca fadhbanna nascachta a bheith ann uaireanta.¹
- 12.46** Thrácht an fhoireann iniúchta freisin ar chinneadh a rinneadh chun trí long a bhaint den tseirbhís (LÉ Orla, LÉ Ciara agus LÉ Eithne) agus go raibh méid stoic nach beag á choinneáil ag an mBunáit Chabhlaigh, ar cuireadh i leataobh é chun cothabháil agus seirbhísiú a dhéanamh ar na longa sin.²
- 12.47** Dúradh leis an bhfoireann scrúdaithe go gcaithfí le sciar cuibheasach mór den stoc á choinneáil sa phríomhstóras cabhlaigh mar stoc atá as feidhm mar gheall ar an gcinneadh chun na longa sin a bhaint den tseirbhís.³ Rud eile de, is mar chuid den phróiseas díchoimisiúnaithe a thabharfar faoi chuntas stórais a leithdháileadh ar na longa a dhúnadh agus fáil réidh leis na hearraí stoic.
- 12.48** Dúirt an Roinn go raibh gá leis an stoc lena chinntiú go raibh na longa inseolta i gcónaí, ar chúiseanna sábháilteachta agus oibríochta, go dtí go mbeadh an cinneadh chun iad a bhaint den tseirbhís déanta. Dúirt sí, fiú tar éis an cinneadh a bheith déanta, go raibh dualgas ann fós cothabháil a dhéanamh ar na longa sin chun go mbeadh siad inseolta go dtí go bhfaighfí réidh leo.⁴
- 12.49** Tá seilfré ag earraí stoic amhail armlón. Is beag tóir a bhíonn ar an stoc seo uaireanta toisc nach n-úsáidtear ach sciar beag den armlón go bliantúil le haghaidh riachtanais oiliúna agus seirbhíse. Dúirt an Roinn go gcaithfeadh Óglaigh na hÉireann stoc armlóin straitéisigh agus sábháilteachta a choinneáil chun críocha teagmhasacha i gcomhair na ról a shannann an Rialtas dóibh.
- 12.50** Nuair a mheastar earraí a bheith ina stoc atá as feidhm, is iondúil go bhfaightear réidh leo (a luaithe a fhaightear cead chuige sin ón mBord Suirbhéireachta) agus go mbaintear iad den chóras bainistíochta stoic. In amanna, bíonn moill ann idir earraí a shainaithint mar stoc atá as feidhm agus Bord Suirbhéireachta a chríochnú. Mar fhreagairt do thuarascáil Dunning, cuireadh beartas diúscairthe i bhfeidhm agus cuireadh rialacháin athbhreithnithe Óglaigh na hÉireann agus nósanna imeachta nua i bhfeidhm.⁵ Mar sin féin, tá fadhbanna fós ann maidir le diúscairtí, go háirithe maidir le hearraí barrachais/earraí atá as feidhm a dhiúscairt.
- 12.51** Tar éis é a bheith ina údair imní gur thángthas ar earraí cuntais stórais ordanáis agus stoic lasmuigh de bhunáit mhíleata ar díscríobhadh iad le haghaidh diúscairthe roimhe seo, rinne aonad iniúcháireachta inmheánaí na Roinne iniúchadh ar stóras ar leith i mí na Samhna 2021. Fuarthas amach san iniúchadh go raibh comhpháirteanna ordanáis ann sa stóras a raibh sé beartaithe iad a dhiúscairt ach nár diúscairíodh go fóill, cé gur baineadh den chóras stoic iad.
- 12.52** Tháinig roinnt moltaí as an iniúchadh, lena n-áirítear: gach cáipéisíocht stocáirimh a choinneáil; rian iniúchta iomlán a bheith ann le haghaidh diúscairthe; féachaint chuige go scriosfaí stoc/go ndiúscairíodh é díreach tar éis Bord Suirbhéireachta a dhéanamh; agus limistéar slán a bheith réidh fad is atáthar ag feitheamh le cinneadh Boird Suirbhéireachta.
- 12.53** Dúirt an Roinn, ó rinneadh an t-iniúchadh inmheánach, go bhfuil gníomhartha nach beag déanta chun dul i ngleic leis na fadhbanna sin, lena n-áirítear conradh a shocrú i gcomhair stiallath miotail; slándáil a neartú nuair atáthar ag diúscairt earraí; agus nósanna imeachta agus rialuithe a fheabhsú don stóras atá idir chamáin.

1 A luaithe a fheabhsaíonn nascacht, déanfar uasghrádú ar an gcóras.

2 Bhí an tAire Cosanta i bhfeighil ag searmanas an 8 Iúil 2022 ina ndearnadh na trí long a dhíchoimisiúnú.

3 Níorbh eol an leibhéal iarbhir stoic atá as feidhm go dtí go mbeidh a anailís críochnaithe ag an mBord Suirbhéireachta.

4 Dúirt an Roinn go bhféadfadh go seolfai na longa go dtí tsaoirid diúscairthe tar éis an anailís ba ghá a bheith déanta ag an mBord Suirbhéireachta.

5 Dúirt an Roinn gur shínigh an tAire na rialacháin athbhreithnithe i mí na Samhna 2022.

- 12.54** In 2021, bhunaigh Óglaigh na hÉireann grúpa chun athbhreithniú a dhéanamh ar an bpróiseas Boird Suirbhéireachta. Thuairiscigh an grúpa i dtús 2022, agus athruithe sa phróiseas á moladh acu, lenar áiríodh é a cheangal ar chomhaltaí Boird deimhniú a thabhairt nuair a chuirtear moltaí an Bhoird chun feidhme.
- 12.55** I mí na Samhna 2022, tugadh isteach rialacháin diúscartha athbhreithnithe, lena n-airítear an ceanglas go gcaithfidh beirt chomhaltaí de chuid an Bhoird Suirbhéireachta a dheimhniú go raibh siad i láthair nuair a diúscaíodh earraí ar moladh iad a dhiúscairt.

Dea-chleachtas

- 12.56** Sainaithin an fhoireann scrúdaithe cásanna dea-chleachtas inaistrithe sna próisis bhainistíochta stoic a chleachtann an Roinn Cosanta. Áirítear leo siúd
- an córas CBF, lenar féidir le hÓglaigh na hÉireann a dhéanamh amach an bhfuil an t-earra stoic atá de dhíth á choinneáil in áit eile agus féachaint chuige go n-aistrefar é láithreach
 - áirimh thimthrialla lena réitítear an bealach do mhonatóireacht a dhéanamh ar stoc agus é a chomhaireamh ar bhonn leanúnach gan aon ghá le stóras a dhúnadh ar feadh tréimhse fhada chun stocáirimh a éascú
 - é de nós ag an Aerchór anois stoic atá faoi stiúir an díoltóra a úsáid, rud a chuireann próisis éifeachtúla bainistíochta fardail chun cinn agus a aistríonn chuig na soláthraithe an riosca bainistíochta a bhaineann le stoic a choinneáil
 - níl an oiread chéanna páirteanna breise ag teastáil chun freastal ar riachtanais ó tharla gur féidir le pearsana a bhfuil sainscileanna acu deisiúcháin a dhéanamh ar shócmhainní chomh maith le cinneadh a dhéanamh go bhfuil earra stoic as feidhm
 - trédhearcacht sa phróiseas bainistíochta stoic trí stoc a díscríobhadh a nochtadh sa chuntas leithreasa bliantúil.

Conclúidí agus moltaí

- 12.57** Bhí stoc míleata arbh fhiú €254 mhilliún iad á gcoinneáil ag deireadh 2022. Coinnítear stoc i roinnt stóras míleata ar fud na tíre agus déantar idirbhearta sna stórais sin a thaifeadadh i mbreis agus 380 cuntas stórais i gcóras chreat bainistíochta faisnéise na Roinne.
- 12.58** Rinneadh athbhreithniú foirmiúil ar bhainistíocht fardail in Óglaigh na hÉireann in 2014. Tuarascáil Dunning an toradh a bhí air sin. Mar chuid den tuarascáil bhí 27 moladh a bhain le réimsí éagsúla. Faoi mhí an Mheithimh 2023, bhí sé mholadh ann nach raibh curtha chun feidhme go hiomlán fós.
- 12.59** Táthar ag gabháil do ghlanadh sonraí agus d'earraí á stóráil ag Óglaigh na hÉireann a aicmiú i gceart le blianta beaga anuas. Moladh i dtuarascáil Dunning go dtabharfaí tionscadail sa réimse seo chun críche chomh luath agus is féidir. Níor éirigh leis an Roinn a cuid oibre sa réimse seo a chríochnú go fóill.

Moladh 12.1

Ba cheart pé moltaí i dtuarascáil Dunning nach bhfuil curtha chun feidhme go fóill a chur i ngníomh go pras. Ba cheart plean forfheidhmithe a bhfuil spriocanna soláthar agus garspriocanna aige a chur i bhfeidhm.

Freagra an Oifigigh Cuntasaíochta

Comhaontaítear.

Tá 21 mholadh de na 27 moladh i dtuarascáil Dunning curtha chun feidhme faoin am seo. Tá neart oibre déanta i gcás na sé mholadh eile, agus an chuid is mó acu geall le bheith curtha chun feidhme go hiomlán, mar atá leagtha amach i bhFíor 12.4 thuas. Ó eisíodh tuarascáil Dunning, tá roinnt saincheistanna tagtha chun cinn a thagann salach ar an iarracht chun na moltaí sin a chur chun feidhme, lena n-áirítear an plean atá ar bun an Roinn Cosanta a aistriú go SCBA (plean a bhí le cur i gcrích in 2018) agus tuarascáil an Choimisiúin maidir le hÓglaigh na hÉireann. Breithneoidh an Roinn agus Óglaigh na hÉireann na moltaí atá fágtha faoi choinne plean a cheapadh chun iad a thabhairt chun críche.

Amlíne don chur chun feidhme

Breithneoidh an Roinn agus Óglaigh na hÉireann na moltaí atá fágtha agus cuirfidh siad plean i leith iad a thabhairt chun críche i bhfeidhm faoi R1 2024.

- 12.60** Tháinig an fhoireann scrúdaithe ar roinnt earraí ar aicmíodh go mícheart iad — mar shampla, earraí a bhí fós á n-áireamh mar stoc sa chuntas stórais cé go raibh siad in úsáid.

Moladh 12.2

Ba cheart don Roinn breithmheas a dhéanamh ar an nglanadh sonraí agus ar an bpróiseas códaithe atá ar siúl faoi láthair, lena n-áirítear aicmiú sócmhainní lena shainaithint cén fáth go bhfuil mí-aicmiú fós ag tarlú; chomh maith leis an treoir ghaolmhar a nuashonrú lena chinntiú go ndéanfar stoc agus sócmhainní a aicmiú i gceart amach anseo agus go mbainfear as taifid cuntais stórais aon stoc a eisítear lena úsáid.

Freagra an Oifigigh Cuntasaíochta

Comhaontaítear.

Tá an cion trom den ghlanadh sonraí agus den tionscadal códaithe déanta. Tá stop sealadach curtha leis le bliain anuas de bharr uasghrádú atá á dhéanamh ar chóras airgeadais comhtháite na Roinne Cosanta (modúil fardail agus sócmhainní seasta san áireamh) agus atá fós idir lámha. A luaithe a thagann an córas nua i bhfeidhm, cuirfear tús arís leis an obair ar an tionscadal. É sin ráite, caithfidh an tionscadal aghaidh a thabhairt ar na caighdeáin cuntasaíochta rialtais láir atáthar ar tí a fhoilsiú, agus an chosúlacht air go n-eiseofar iad roimh dheireadh na bliana. Mar chuid de na caighdeáin nua sin beidh sainmhínte agus treoirlínte nua maidir le fardal agus le sócmhainní seasta. Féachfaidh an Roinn chuige go gcuirfear na treoirlínte sin i bhfeidhm.

Amlíne don chur chun feidhme

Cuirfear an moladh seo chun feidhme faoi dheireadh na bliana 2024.

- 12.61** I mí Eanáir 2015, mar fhreagairt do mholtaí tuarascáil Dunning, ghlac Óglaigh na hÉireann beartas bainistíochta stoic chucu féin i gcomhair na tréimhse ó 2015 go 2020. Beidh an próiseas sin fós i bhfeidhm go dtí mí na Bealtaine 2023.
- 12.62** Maidir le gnéithe de bheartas 2015, amhail uimhreacha stoic a shainiú mar chuid den chreat rialaithe stoic agus príomhtháscairí feidhmíochta (PTFanna) á úsáid, níl siad curtha chun feidhme go fóill.

- 12.63** Tháinig beartas bainistíochta stoic nua, i gcomhair na tréimhse ó 2023 go 2025, in éifeacht ag deireadh mhí na Bealtaine 2023. Faoin mbeartas nua, caithfear bearta rialaithe stoic a chur chun feidhme (trína ndéantar an leibhéal stoic de gach earra á choinneáil a bhreithniú agus a bhainistiú) faoi cheann dhá mhí dhéag ó uasghrádú córais atá beartaithe. Táthar ag súil go mbeidh sé sin críochnaithe faoi dheireadh 2023. Ceanglaítear leis an mbeartas sin PTFanna a shainaithint, a chur chun feidhme agus a thuairisciú ar bhonn ráithiúil, ag tosú ag deireadh R3 2023.

Moladh 12.3

Ba cheart athbhreithnithe a dhéanamh ó am go ham (e.g., go bliantúil) chun a chinntiú go bhfuil riachtanais bheartais á gcur i ngníomh mar a bhí beartaithe agus chun a chinntiú go mbíonn gach gné den bheartas i gcónaí in oiriúint do riachtanais Óglaigh na hÉireann i láthair na huaire agus amach anseo.

Freagra an Oifigigh Cuntasaíochta

Comhaontaítear.

Tá an moladh seo á chur chun feidhme. Tá athbhreithniú déanta ar bheartas bainistíochta stoic Óglaigh na hÉireann agus cuireadh beartas nua i bhfeidhm le déanaí don tréimhse 2023-2025. Ina gcáil mar phríomh-gheallsealbhóirí, ceanglófar ar Stiúrthóirí Cóir tuarascálacha a chur isteach go rialta faoin obair atá déanta acu ar an mbeartas a chur chun feidhme.

Amlíne don chur chun feidhme

Tá an beartas seo á chur chun feidhme faoi láthair agus beidh sé i bhfeidhm go hiomlán é faoi dheireadh 2024.

- 12.64** Tá stoc á choinneáil ag Óglaigh na hÉireann i mbreis agus 380 cuntas stórais. Tá stoc ar fiú €87 milliún é sa chuntas is mó agus leath luach an stoic roinnte thar cheithre chuntas. Tá líon mór cuntas ann ina bhfuil stoc nach bhfuil luach rómhór ag baint leis, agus rioscaí slándála gaolmhara agus costais slándála ghaolmhara ag gabháil leo sin.
- 12.65** Rinneadh athbhreithniú in 2020/2021 ar an gcaoi ina gcuirtear stórais ar bun, lena n-áirítear an bunús le suíomhanna a roghnú agus na socruithe maidir le stórais a bhainistiú. Aimsíodh san athbhreithniú go raibh dlúthbhaint ag líon na gcuntas le heagraíocht is struchtúr Óglaigh na hÉireann agus moladh líon na gcuntas a laghdú beagáinín; chomh maith le cuntais eile a atheagrú agus athainmniú. Níl na moltaí curtha chun feidhme go fóill, áfach.

Moladh 12.4

Maidir leis na moltaí a d'eascair ón athbhreithniú a rinneadh ar an gcaoi ina gcuirtear na stórais ar bun, ba cheart iad a chur i ngníomh go pras. Ba cheart athbhreithniú a dhéanamh ó am go chéile freisin ar an ngá atá le líon mór cuntas stórais ar luach íseal a choimeád i mbun feidhme.

Freagra an Oifigigh Cuntasaíochta

Comhaontaítear.

Níor cuireadh na moltaí seo chun feidhme go fóill, ó tharla gur dócha go dtiocfaidh athruithe eile ar struchtúr agus eagrú Óglaigh na hÉireann, agus ar an arm go mór mór, de bharr mholtaí an Choimisiúin maidir le hÓglaigh na hÉireann. A luaithe a thugtar cuntas níos soiléire ar an struchtúr atá beartaithe don arm, pléifear an tsaincheist seo arís.

Amlíne don chur chun feidhme

Ní léir fós an amlíne ina mbeartaítear an moladh seo a chur chun feidhme ó tharla go mbeidh tionchar ag an athbhreithniú arna mholadh ag an gCoimisiún ar struchtúr Óglaigh na hÉireann. Cuirfear an moladh chun feidhme faoi cheann bliana ón tráth a dtabharfar an t-athbhreithniú chun críche.

- 12.66** Suas go dtí 2022, bhíodh cur chuige neamh-chomhsheasmhach á ghlacadh i leith stoc a luacháil ar fud Óglaigh na hÉireann. Dhéantaí stoc míleata a luacháil ag meánchostas ar bhonn stóras-ar-stóras, fad is a dhéantaí stoc an Aerchoir a luacháil ag an gcostas ceannaigh bunaidh. D'athraigh sé sin in 2022 agus déantar gach stoc míleata a luacháil anois ag meánchostas, nós atá le sonrú i gcuntas leithreasa na Roinne do 2022.
- 12.67** Mar fhreagairt do thuarascáil Dunning, tá feabhas curtha ar an gcaoi ina ndéantar stoc as feidhm a díscríobhadh a thuairisciú, mar chuid den chuntas leithreasa bliantúil. Mar sin féin, thángthas ar chásanna inar díscríobhadh earraí stoic ó chóras an chreata bainistíochta faisnéise ach b'amhlaidh nár diúscaíodh na hearraí sin ar bhealach rialaithe.
- 12.68** Thug an fhoireann iniúchóireachta inmheánaí faoi athbhreithniú ar stóras ar leith i mí na Samhna 2021, áit nár diúscaíodh go fisiciúil earraí a díscríobhadh cheana féin ón gcóras. Moladh san iniúchadh, *inter alia*, an gá a bhí le: gach cáipéisíocht stocáirimh a choinneáil; rian iniúchta iomlán a bheith ann le haghaidh diúscairthe; féachaint chuige go scriosfaí stoc/go ndiúscaíodh é díreach tar éis cinneadh ón mBord Suirbhéireachta; agus limistéar slán a bheith ann le haghaidh stoc a bhfuil cinneadh le déanamh ag an mBord Suirbhéireachta ina leith.
- 12.69** Tugadh isteach rialacháin athbhreithnithe diúscairthe i mí na Samhna 2022, lena n-airítear an ceanglas go gcaithfidh beirt (den triúr) comhaltaí de chuid an Bhoird Suirbhéireachta a dheimhniú go raibh siad i láthair nuair a diúscaíodh earraí ar moladh iad a dhiúscairt.

Moladh 12.5

Ba cheart tabhairt faoi athbhreithniú níos forleithne a dhéanamh ar stórais lena fháil amach cad iad na bunchúiseanna atá ag teacht salach ar dhiúscairt thráthúil fhisiciúil gach earra stoic go pras chomh maith le plean gníomhaíochta a chur i bhfeidhm chun dul i ngleic leis na cúinsí a sainaitníodh.

Freagra an Oifigigh Cuntasaíochta

Comhaontaítear.

Thug aonad iniúchóireachta inmheánaí na Roinne faoi athbhreithniú ar phríomhstóras, áit nár diúscaíodh go fisiciúil agus go pras earraí a díscríobhadh cheana féin ón gcóras. Aimsíodh san athbhreithniú roinnt cúiseanna taobh thiar de na moilleanna.

Ina theannta sin, tugadh faoi athbhreithniú foirmiúil ar phróiseas an Bhoird Suirbhéireachta. Mar gheall air sin, leasaíodh rialacháin shonracha lena rialaítear Boird Suirbhéireachta chun aghaidh a thabhairt ar na nósanna imeachta sin, agus shínigh an tAire leagan leasaithe de Rialachán Óglaigh na hÉireann (DFR L7) an 10 Samhain 2022.

Tabharfar faoi athbhreithniú níos leithne ar stórais mar a mholtar. Déanfaidh sé sin forbairt ar fhionnachtana an athbhreithnithe iniúchóireachta inmheánaí agus ar fhionnachtana an athbhreithnithe ar an bpróiseas Boird Suirbhéireachta araon.

Amlíne don chur chun feidhme

Cuirfear an moladh seo chun feidhme faoi R2 2024.

Moladh 12.6

Ba cheart rialú breise a thabhairt isteach sa chaoi is go dtugann baill den Bhord Suirbhéireachta ábhartha deimhniú foirmiúil pras maidir le diúscairt earraí míleata íogaire sula ndéantar na hearraí sin a dhíscríobh ón gcóras bainistíochta stoic. Ba cheart na rialacháin diúscartha a nuashonrú chun na ceanglais sin a chur san áireamh.

Freagra an Oifigigh Cuntasaíochta

Comhaontaítear.

Tá an moladh seo curtha chun feidhme cheana féin a bheag nó a mhór.

Maidir leis an moladh 'go dtugann baill den Bhord Suirbhéireachta ábhartha deimhniú foirmiúil go pras maidir le diúscairt earraí míleata íogaire sula ndéantar na hearraí sin a dhíscríobh ón gcóras bainistíochta stoic', is amhlaidh, de réir na nósanna imeachta atá i bhfeidhm faoi láthair, a chaithfear gach earra a choinneáil ar an gcóras bainistíochta stoic go dtí go ndiúscrófar iad mar is ceart. Tá treoracha follasacha chuige sin á meas faoi láthair i gcomhthéacs an athbhreithnithe atá á dhéanamh ar Ordú Óglaigh na hÉireann 01/2014 – *Nósanna Imeachta Cuntasaíochta do Stórais Mhíleata agus do Cheardlanna Míleata*.

Amlíne don chur chun feidhme

Cuirfear an moladh seo chun feidhme faoi R2 2024.

Iarscríbhinn 12A Measúnú ar an gcaoi ina bhfuil moltaí de chuid thuarascáil Dunning 2014 á gcur chun feidhme

Príomh-mholtaí ^a	Tosaíocht ^c	Beal. 2015	Noll. 2016	Meitheamh 2023
Tosaíocht uileghabhálach^b				
1. Ba cheart foireann bheag thiomanta de phearsanra sibhialta agus Óglaigh na hÉireann a bhunú a bhfuil sé de shainchúram uirthi dlús a chur le moltaí an athbhreithnithe a chur chun feidhme.	Ard			
2. Ba cheart plan trealaimh nua d'Óglaigh na hÉireann a thabhairt chun críche ar bhonn práinne, lena n-áirítear obair chun caiteachas Cosanta áirithe a athaicmiú, mar shampla, stoc áirithe a athaicmiú mar shócmhainní.	Ard			
3. Ba cheart ráiteas beartais diúscartha nua agus ráiteas bainistíochta stoic nua a chomhaontú.	Ard			
4. Athbhreithniú a dhéanamh ar na struchtúir bainistíochta fardail atá ann cheana agus ar shocruithe stórála.	Meánach			
5. Ba cheart an leithdháileadh acmhainní bliantúil a dhéanann focheannasaí agus na próisis maoirseachta fardail atá beartaithe a bheith ag teacht le chéile ar bhealach níos soiléire.	Meánach			
6. Spriocanna agus torthaí bainistíochta fardail soiléire a chomhaontú.	Ard			
7. Gach gné de shaolré fardail a choinneáil faoi athbhreithniú agus monatóireacht a dhéanamh ar naisc.	Meánach			
8. Ba cheart don Roinn Cosanta agus d'Óglaigh na hÉireann treoirphlean i leith na moltaí a chur chun feidhme a chomhaontú eatarthu féin tar éis dóibh teacht ar a dtuairim féin faoin athbhreithniú.	Ard			
Soláthar				
9. Ba cheart an próiseas soláthair a bheith faoi réir breis comhordaithe straitéisigh faoi stiúir an láir idir an Roinn agus Óglaigh na hÉireann, agus é faoi stiúir ag an bhfoireann bheartaithe nua.	Ard			

Príomh-mholtaí ^a	Tosaíocht ^c	Beal. 2015	Noll. 2016	Meitheamh 2023
Bainistíocht				
10. Ba cheart don Ghrúpa um Pleanáil Ardleibhéil agus Soláthar (GPAS) ráitis bheartais stoic a fhaomhadh don Armchór, don Aerchór, agus don tSeirbhís Chabhlaigh uile agus iad a chur chun feidhme ar bhonn práinne.	Ard			
11. Ba cheart don Bhord um Stoc atá As Feidhm nó Gan Tóir Rómhór Air luí isteach ar a gcuid oibre agus a gcuid oibre a thuairisciú do GPAS, agus a aird á leagan ar stoc an-luachmhar nach raibh tóir rómhór air le tamall fada.	Meánach			
12. Caithfear cur leis an eBS de réir mar is gá ar mhaithe le gach faisnéis ábhartha a thuairisciú i bhfíor-am agus go cruinn. Déanfar breithniú dáiríre i dtaobh an CCAB a ghlacadh isteach san eBS.	Meánach			
13. Ba cheart do Stiúrthóirí Cóir freastal go rialta ar chruinnithe den fhoghrúpa nua GPAS maidir le bainistíocht fardail agus le diúscairt fardail.	Meánach			
14. Ba cheart d'Óglaigh na hÉireann cumarsáid níos fearr a chothú idir feidhmeanna maidir le bainistiú fardail.	Ard			
Diúscairt				
15. Féachaint chuige go n-éiríonn GPAS i bhfad níos gníomhaí agus go mbeidh diúscairtí mar chuid de shainchúram na foirne míleata/sibhialta atá beartaithe. Ba cheart foghrúpa de GPAS a chur ar bun chun aghaidh a thabhairt ar bhainistiú fardail agus ar dhiúscairt fardail.	Ard			
16. Ba cheart cuíchóiriú a dhéanamh ar an bpróiseas foirmiúil chun farasbarr fardail a shainnithint ar bhealach a bhaineann leas níos mó as próiseas na n-oifigeach teicniúil seachas an Bord Suirbhéireachta.	Meánach			
17. Ba cheart do Bhainse Lóistíochta Óglaigh na hÉireann tuarascáil ar dhul chun cinn a dhéanamh go ráithiúil ar na Boird Suirbhéireachta a tionóladh agus iad sin a chur faoi bhráid na foirne beartaithe nua agus ar aghaidh chuig foghrúpa GPAS.	Meánach			
18. Ba cheart do Bhoird Suirbhéireachta dul i gceann a gcuid oibre agus í a chríochnú laistigh de thréimhse ama shonraithe a leagann foghrúpa GPAS amach dóibh.	Ard			

Príomh-mholtaí ^a	Tosaíocht ^c	Beal. 2015	Noll. 2016	Meitheamh 2023
19. Is cuma más iad na Boird Suirbhéireachta nó grúpa eile ba bhun leo, ba cheart don fhoireann bheartaithe nua cloí go lárnach le gach díscríobh d'fharasbarr fardail atá beartaithe agus na ranna ábhartha éagsúla a chur ar an eolas fúthu.	Ard			
20. Ba cheart tús áite a thabhairt d'earraí barrachais a dhíol mar mhodh chun iad a dhiúscairt. Ba cheart beartas ina leith sin a chomhaontú leis na ranna ábhartha, lena n-áirítear an Roinn Gnóthaí Eachtracha agus an Roinn Caiteachais Phoiblí, Seachadta ar an bPlean Forbartha Náisiúnta, agus Athchóirithe.	Ard			
Luacháil				
21. Ba cheart measúnú a dhéanamh láithreach bonn ar cé acu a úsáideadh/a ídíodh nó nár úsáideadh/nár ídíodh fardal i láithreacha réigiúnacha.	Ard			
22. Tá RCPSPFNA agus Oifig an Ard-Reachtair Cuntas agus Ciste chun athbhreithniú a dhéanamh ar an mbeartas cuntasáiochta i leith fardal a luacháil.	Meánach			
23. Maidir le tionscadail éagsúla atá idir lámha chun cóid a ghlanadh suas, ba cheart leanúint leo agus iad a thabhairt chun críche chomh luath géar agus is féidir. Ba cheart líon na dtuairiscí catagóire agus earra a chuíchóiriú.	Meánach			
Tuairisciú				
24. Ba cheart foilseachán a dhíríonn ar fhardal a chur i dtoll a chéile go bliantúil (agus Meastacháin a fhoilsiú leis). Ba cheart don foilseachán nua faoi fhardal a bheith ar comhréir leis na figiúirí sna cuntais leithreasa ábhartha.	Meánach			
25. Ba cheart don fhoireann thiomnaithe atá beartaithe an foilseachán nua a chomhordú fad is faoi GPAS atá sé é a cheadú, agus ba cheart don dá Bhrainse Airgeadais agus don Choiste Bainistíochta Sinsearaí foilseachán meastachán Óglaigh na hÉireann bliantúil a athbhreithniú agus a fhaomhadh.	Meánach			
26. Ba cheart figiúr sonracha i leith earraí a díscríobhadh a bheith sa tábla sa chuntas leithreasa maidir le bogadh fardail bliain ar bhliain.	Meánach			

Príomh-mholtaí ^a	Tosaíocht ^c	Beal. 2015	Noll. 2016	Meitheamh 2023
-----------------------------	------------------------	---------------	---------------	-------------------

Acmhainneacht TFC

27. Ba cheart don Eagraíocht um Chosaint athbhreithniú a dhéanamh ar an straitéis atá aici i leith teicneolaíocht faisnéise agus cumarsáide (TFC) a fhí isteach i slabhra soláthair Óglaigh na hÉireann le gur féidir lántairbhe a bhaint as cumais TFC ar bhealach a chuireann bonn faoi fheidhmíocht éifeachtúil ar fud an tslabhra soláthair.	Meánach	●	●	●
--	---------	---	---	---

● Curtha chun feidhme ● Curtha chun feidhme go páirteach

Foinse:	An Roinn Cosanta
Nótaí:	a Is leagan giorraithe de na moltaí iomlána atá sna sonraí a cuireadh ar fáil anseo. Tá go leor de na moltaí fite fuaite lena chéile agus níl siad comheisiatach ar a chéile. b Catagóir molta den athbhreithniú. c Rangú tosaíochta.